

BYGDEBOKNEMNDA FOR LINDÅS SOKN - ÅRSMELDING 2017

Det har vore aktivitet i nemndarbeidet på ulike område. Har hatt to møte for heile nemnda, og mykje kontakt pr. telefon og e-post. Var representerte med stand på Liv og lyst- tilstelling i Lindåshallen i mars.

Norvald Halland gjennomførte eitt nytt kurs i **slektsgransking** i februar 2017 med 15 deltakarar. Kurset gjekk i Lindåshallen over fire kveldar. Kjell Hauge var støttespelar også på dette kurset. Norvald og Kjell har hatt eit slektsgranskar-treff på møterommet i senteret, der nokre interesserte frå kursa vart inviterte til å delta. Dette vonar ein kan halda fram.

Internettsida www.lindaasbygdebok.no tek form! Føremålet var i første omgang å gjera biletmaterialet vårt tilgjengeleg for ålmenta. Berre ein del av dei innsamla bileta kunne få plass i bøkene, og me ville gjerne dela også resten. Kanskje finn nokon fram andre gamle bilete òg? Etter litt oppstartvanskar kom Jarle Fanebust i gang med å leggja ut bileta i mars 2017. Han fekk god drahjelp av Geir Kleiveland i Osterøy sogelag. I tillegg til ulike nettprogram, har ein nytta det gratis biletprogrammet Coppermine, og kopla det til nettsida vår. No, etter eitt år, er alle bileta lagte ut, to og eit halvt tusen i talet. Bileta var opphavelig skanna inn i TIFF-format, eit format som er eigna for bok-trykking, men er litt for stort eller tungt til nettbruk. Bileta vart no laga om til såkalla JPG-format v.h.a Adobe Paintshop. Det gjer dei raskare og lettare å henta dei på nettet. Nemnda ser gjerne at bileta vert brukte, men vil gjerne ha noko kontroll, så difor bruker me eit vassmerke på nettet. Så kan evt. brukarar ta kontakt med nemnda om dei vil gjera seg nytte av bileta, og få kopiar utan vassmerke mot ei lita godtgjering.

Bileta er søkbare: ein kan søkja på namn i ulike samanhengar (t.d etternamn, fornamn, stad, hending), ein kan søkja på gardsnummer (få opp alle bileta som er knytte til ei viss grend), og på mange av bileta har me lagd inn såkalla emneknaggar (t.d. jordbruk, bryllup, kyrkje, fiske osv.)

Det er og nyleg blitt høve for nettbrukarane til å leggja inn utfyllande kommentarar / korrigeringar til biletsamlinga, noko me vonar mange vil nytta seg av. Utan at me til no har drive noko aktiv marknadsføring av nettsidene, ser det ut for at biletsamlinga vekker interesse. Sidan mars 2017 har kring 33 000 bilet-eksemplar blitt henta fram! (Coppermine-programmet har innebygd teljar)

Hans Jakob Låstad, Sigbjørn Tenjum og Audun Fanebust har gjennomført **intervju** med Olav Holmås, Ingebjørg Fanebust Waage, Alfhild Mongstad Kårdal, Arild Låstad og Magne Bakke. Her har ein fått dekkja mykje frå Verås og Risa, der me mangla innsamla stoff frå før. Dette prinsippet bør gjerne liggja til grunn når ein bestemmer nye intervju.

Hans Jakob har og samla ein del lokalhistorisk stoff frå ulike kjelder. Avisutklipp: 1. Gula Tidend 1919 - Marknad Lindås Ungdomslag, 2. Bergens Aftenblad – Klokke Låstad Avskjedsord, 3. Steinar Fanebust 60 år. Minne frå Haukås av Reidar Haukås, Den indre farleia Bergen-Mongstad av Ingvald Bastesen, Kårkallen mimrar – streif gjennom saga frå istid til oljealder av Mons Kvalvågnes. Dette stoffet ligg i arkiva på gards- (og evt. bruks-)nr. Karstein Stene har gitt diktet «Telefonstolpen» av Tom Lygre, og Song til 80-årsfeiringa til Anton Støldal av Spj (= Knut Spjeldnes).

Bygdeboknemnda fekk i april ei sjeldan **gåve** frå Svein Nilsen, systerson av Klaus Natås, som var busett på bnr 4 i Saltneet, der Katharina Saltne hadde kår på sine eldre dagar. Det var eit svært godt bevart **brev frå Magnus Dagestad på Voss til Katharina**, der han uttrykkjer sin store respekt for arbeida hennar, og fortel at han brukar nokre av hennar teikningar for elevane på kunsthandverksskulen sin. Han skriv og varmt om venskapen deira frå dei gjekk i lære hjå Lars Kinsarvik i Øystese, og vonar å sjå meir til henne. Brevet har nok interesse for mange, og innhaldet bør gjerast tilgjengeleg for flest mogeleg, samstundes som ein tek vare på klenodiet.

Innsamling av bilete har av ymse grunnar vore sett på vent. Her trengst det meir mannskap, og nye folk er velkomne! Det at heimesida no fungerer så bra, bør vera eit sterkt argument for å setja i gang.

Nils Holmås sitt stykke om **Butikken på Leite**. Kolbjørn Fjellanger sin butikk, var kjekk å lesa i Mimra. Meir av arkivstoffet vårt kan verta brukt slik må me vona! Her er og plass for nye interesserte brukarar og skrivarar!

Sidan me er vane med å leva nøkternt, er **økonomien** under kontroll, og me har framleis nokre reservekroner i banken (52 000 kr). Salet av bygdebøker gav vel 11 200 kr i kassen (ca halvparten kom frå bokhandlarane). Kommunalt tilskot på 5000 kroner, tilskot til husleige på 3000 kroner frå bygdelaget og grasrotmidlar 1500 kroner utgjer resten av inntektene.

Dei største utgiftene våre har vore husleige og senteravgift på ca 9000 kroner, og kontorutgifter på vel 2000 kr. Me er og medlemmer i Slekt og data, og mottek medlemsblad med mykje interessant stoff, og det kostar nokre kroner året å leiga web-hotell. Kontorfellesskap med bygdelaget har fungert godt, og me vonar det vil halda fram. Me er svært nøgde med kontorplassen vår i senteret. Det å ha ein stad å oppbevare arkivmateriale og bøker, er viktig!

Arbeid framover:

- * **Ny organisering av nemnda.**
- * Verving av nye medlemmer
- * Vidare arbeid med intervju
- * Innsamling av bilete
- * Halda fram med eit forum for slektsgransking
- * Vidare arbeid med heimesida: forbetra utsjånad/bunad og gje meir informasjon ut til brukarane.
- * Rydding- organisering av arkivstoffet, få lagt inn oversyn på heimesida.

Takk også i år til Hundvin Handel og Molly Me for sal av bøker

Gjertrud Fanebust
Leiar

Irene Iversen
Nestleiar

Reidar Haukås
Styremedlem

Audun Fanebust
Styremedlem

Hans J. Låstad Lygre
Styremedlem

Sigbjørn Tenjum
Styremedlem

Karstein Stene
Styremedlem

Ove Jan Paulsen
Styremedlem

Kjell Hauge
Kasserar